



*Le Roy Dauid ayant veu Bersabée se lauuant, en deuint amoureux ;  
& commit adultere avec elle.*

**V**AND Dauid sceut la mort du Roy des enfans d'Ammon , il enuoya ses seruiteurs vers son fils Hanon , tant pour le consoler , que pour continuer alliance avec luy : Mais les Ammonites dirent à leur Roy, Ne pensez pas que Dauid enuoye vous consoler pour la mort de vostre pere , mais pour espier vos places , & voir vos forces. Parquoy par ignominie, Hanon leur fit razer la moitié de leurs barbes, & couper la moitié de leurs habits , dequoy Dauid fut tant courroucé, qu'il employa tous les moyens pour venger cette injure ; dont enfin les Ammonites furent défaits en plusieurs batailles que Dauid leur fit liurer, desquelles Ioab fut conducteur general ; lequel pour mettre fin à cette guerre , assiegea la ville de Rabba : & pendant que ces choses se passoient, Dauid estoit en Ierusalem , où il faisoit sa residence. Et ainsi qu'apres son disner il se promenoit sur le haut de son Palais, il vid vne femme fort belle qui se lauoit en vn iardin , nommée Bersabée, fille d'Eliam, & femme d'Vrie, qui estoit pour lors avec Ioab au siege de Rabba. Il enuoya vers elle vn messager, qui luy fit sçauoir le desir du Roy ; qui enfin l'enleua, & dormit avec elle ; qui s'estant purifiée, s'en retourna en sa maison ; & cét adultere fut suiuy de la mort d'Vrie son mary, dont Dauid fut coupable.